

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**Z A K O N
O DOPUNI ZAKONA O BUDŽETIMA U FEDERACIJI BOSNE I HERCEGOVINE**

Sarajevo, decembar 2016. godine

PRIJEDLOG ZA DONOŠENJE ZAKONA PO HITNOM POSTUPKU

Predlažemo donošenje Zakona o dopuni Zakona o budžetima u Federaciji Bosne i Hercegovine po hitnom postupku obzirom da nije izabrano Gradsko vijeće Grada Mostara, te ne postoji zakonski osnov za donošenje Budžeta Grada Mostara i Odluke o izvršavanju Budžeta Grada Mostara za 2017. godinu, čime je onemogućeno finansiranje javnih funkcija, što bi za posljedicu imalo finansijsku blokadu Grada. Uvažavajući vremensku dinamiku, potrebno je za dopunu Zakona o budžetima u Federaciji Bosne i Hercegovine osigurati hitnu proceduru kako bi se Budžet Grada Mostara i Odluka o izvršavanju Budžeta Grada Mostara za 2017. godinu donijeli prije početka nove fiskalne godine.

Ističemo da su u tom smislu ispunjeni uslovi iz čl. 191. i 192. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08) i čl. 186. i 187. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03 i 21/09).

Z A K O N

o dopuni Zakona o budžetima u Federaciji Bosne i Hercegovine

Član 1.

U Zakonu o budžetima u Federaciji Bosne i Hercegovine ("Službene novine Federacije BiH", br. 102/13, 9/14, 13/14, 8/15, 91/15 i 102/15), iza člana 105c., dodaje se novi član 105d. koji glasi:

"Član 105d.

Izuzetno i isključivo u svrhu osiguranja finansiranja Grada Mostara u 2017. godini Budžet Grada Mostara kao i Odluku o izvršenju Budžeta za 2017. godinu donijet će i biti odgovoran za njegovu provedbu gradonačelnik Grada Mostara, uz saglasnost načelnika za finansije Grada Mostara."

Član 2.

Ovaj Zakon stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE ZAKONA O DOPUNI ZAKONA O BUDŽETIMA FEDERACIJE BOSNE I HERCEGOVINE

I. USTAVNI OSNOV

Ustavni osnov za donošenje ovog zakona sadržan je u odredbama tačke d) Amandmana VIII na Ustav Federacije Bosne i Hercegovine, a u vezi s članom IV.A.20.(1) d) Ustava Federacije Bosne i Hercegovine, prema kojem je u isključivoj nadležnosti Federacije Bosne i Hercegovine donošenje propisa o finansijama i finansijskim institucijama Federacije BiH i fiskalna politika Federacije BiH, a Parlament Federacije Bosne i Hercegovine je ovlašten za donošenje zakona o obavljanju funkcija federalne vlasti.

II. RAZLOZI ZA DONOŠENJE

Obzirom da Gradsko vijeće Grada Mostara nije konstituisano, ne postoji pravni osnov za donošenje Budžeta Grada Mostara i Odluke o izvršavanju Budžeta Grada Mostara za 2017. godinu. Kako bi se osiguralo normalno funkcionisanje javnih institucija Grada Mostara i da ne bi došlo do finansijske blokade, potrebno je putem dopune postojećeg Zakona o budžetima u Federaciji BiH, omogućiti gradonačelniku uz saglasnost načelnika za finansije Grada Mostara donošenje Budžeta i Odluke o izvršavanju Budžeta Grada Mostara za 2017. godinu.

Ističemo da je predložena dopuna Zakona o budžetima u Federaciji BiH identične predloženim izmjenama i dopunama koje je Parlament Federacije BiH usvajao u 2014., 2015. i 2016. godini, a koje su se odnosile na istu problematiku.

III. OBRAZLOŽENJE PRAVNIH RJEŠENJA

Odredbom člana 1. Iza člana 105c. dodaje se novi član 105d. kojim se omogućava gradonačelniku i načelniku za finansije Grada Mostara donošenje Budžeta i Odluke o izvršavanju Budžeta Grada Mostara za 2017. godinu, u cilju normalnog funkcionisanja javnih institucija Grada Mostara.

Odredbom člana 2. propisano je stupanje na snagu zakona.

IV. FINANSIJSKA SREDSTVA

Za provođenje ovog Zakona nisu potrebna dodatna finansijska sredstva iz budžeta Federacije Bosne i Hercegovine.

Odredbe Zakona o budžetima u Federaciji Bosne i Hercegovine („Službene novine Federacije BiH“ br,102/13,9/14,13/14,8/15,91/15 i 102/15) koje se mijenjaju:

XII – PRIJELAZNE I ZAVRŠNE ODREDBE

Član 105.

U slučaju da su odredbe drugih zakona i propisa u suprotnosti sa ovim Zakonom, primjenjivat će se ovaj Zakon.

Član 105.a

Izuzetno i isključivo radi osiguranja finansiranja Grada Mostara u 2014.godini Budžet Grada Mostara, kao i Odluku o izvršenju Budžeta za 2014.godinu donijet će i biti odgovoran za njegovu provedbu gradonačelnik Grada Mostara, uz saglasnost načelnika za finansije Grada Mostara.

Član 105.b

Izuzetno i isključivo u svrhu osiguranja finansiranja Grada Mostara u 2015. godini Odluku o privremenom finansiranju Grada Mostara za period od 1.1. do 31.3.2015. godine donijet će gradonačelnik Grada Mostara, uz saglasnost načelnika za finansije Grada Mostara."

Član 105.c

Izuzetno i isključivo u svrhu osiguranja finansiranja Grada Mostara u 2016. godini Budžet Grada Mostara, kao i Odluku o izvršenju Budžeta za 2016.godinu donijet će i biti odgovoran za njegovu provedbu gradonačelnik Grada Mostara, uz saglasnost načelnika za finansije Grada Mostara.